



Broj/Broj:
Sarajevo/Sarajevo, 24.10.2011.

**IZVJEŠTAJ S 5. KONFERENCIJE PREDSJEDNIKA PARLAMENTA ZEMALJA
ZAPADNOG BALKANA
Budimpešta, 12. oktobar 2011.**

U Budimpešti je, 12. oktobra 2011., održana 5. konferencija predsjednika parlamenata zemalja zapadnog Balkana.

Prvom sesijom, na kojoj su razmatrani izgledi integracija u EU zemalja zapadnog Balkana, kopredsjedavali su predsjednik Nacionalne skupštine Mađarske Laslo Koever i predsjedavajući Predstavničkog doma PSBiH Denis Bećirović.

Tokom rasprave o ovoj temi predsjedavajući Predstavničkog doma PSBiH Denis Bećirović istakao je da su dijalog i saradnja imperativ koji diktira približavanje regije evroatlantskim integracijama, te dodao kako je BiH predana jačem angažmanu u pogledu regionalne saradnje. Ujedno je istakao kako je regionalna saradnja dobar način afirmacije evropskih vrijednosti i dostignuća.

Bećirović je istakao kako očekuje da će Konferencija biti iskorištena za definiranje zajedničkih interesa, prioriteta, ciljeva, ali i pravaca aktivnosti koji će biti refleksija autentičnih potreba regiona i s kojima će se svi parlamenti pojedinačno moći identificirati. On je naglasio da vanjska politika Bosne i Hercegovine ima dva čvrsta stuba - članstvo u Evropskoj uniji i NATO-u, kao i razvijanje dobrosusjedskih odnosa, i dodao da su na tom putu već pređene neke faze, kao što je članstvo u CEFTA-i, kao najznačajnijem obliku regionalne ekonomske i trgovinske integracije. Također, Bosna i Hercegovina je u okviru svojih strateških ciljeva veoma blizu članstvu u Svjetskoj trgovinskoj organizaciji, čime pokazuje jasnu namjeru uključivanja u svjetske trgovinske tokove i integracije. On je naveo da Bosna i Hercegovina u pogledu navedenih integracionih procesa ima unutrašnji bazični politički konsenzus.

Bećirović je istakao da Evropska unija i Sjedinjene Američke Države moraju ostati fokusirane na Bosnu i Hercegovinu i cijeli zapadni Balkan, jer ono što se dogodi u jednoj balkanskoj zemlji neizbježno se reflektira na cijeli region.

On je naglasio da međunarodna zajednica mora biti jasna u opredjeljenju za Bosnu i Hercegovinu kao jedinstvenu državu ravnopravnih naroda i građana u kojoj se neće tolerirati nikakvo osporavanje jedinstva i suvereniteta države i dodao da međunarodna zajednica mora pronaći adekvatne mjere kojima će zaustaviti sve one političare koji krše Dejtonski mirovni sporazum i Ustav BiH.

Istakavši da politički lideri zemalja zapadnog Balkana moraju raditi na promjeni percepcije regiona u Evropskoj uniji, dodao je da balkanski narodi treba da rade zajedno kako bi pokazali evropskim partnerima da Balkan nije teret nego vrijednost koja može unaprijediti evropsku kulturu.

Bećirović je na kraju pozovao učesnike da podrže Bosnu i Hercegovinu na njenom putu ka evroatlantskim integracijama.

Tokom rasprave predsjednik Hrvatskog sabora Luka Bebić istakao je značaj

međuparlamentarne saradnje u okviru procesa evropske integracije zemalja jugoistočne Evrope te razmjene iskustava na tom putu. Kao dobar model parlamentarnog učešća u procesu pristupanja EU, naveo je Nacionalni odbor Hrvatskog sabora za praćenje pregovora koji je svojim sastavom, djelokrugom i načinom rada bitno doprinio uspješnom završetku hrvatskih pristupnih pregovora s Unijom.

Zemlje zapadnog Balkana imaju specifične zajedničke probleme i interese, zato treba da budemo otvoreni jedni prema drugima te ih otvorenim dijalogom rješavamo, rekao je predsjednik Hrvatskog sabora Luka Bebić i dodao kako usprkos svemu bilateralni problemi nisu razlog da zemlje jugoistočne Evrope ne idu putem evroatlantskih integracija, pozvavši sve učesnike Konferencije na intenziviranje saradnje.

Bebić se nadalje osvrnuo i na pitanje nacionalnih manjina koje je u zemljama jugoistočne Evrope potrebno dugoročno kvalitetno riješiti, rekavši kako Hrvatska čvrsto vjeruje u svoje manjine kao most prema matičnim zemljama, a nikako kao teret.

Čestitavši Hrvatskoj na zaključenju pristupnih pregovora s EU te ujedno zahvalivši na ustupljenom prijevodu cjelokupnog pravnog naslijeđa Evropske unije, potpredsjednik Narodne skupštine Srbije Gordana Čomić poručila je kako sve zemlje zapadnog Balkana dijalogom o svim postojećim problemima treba da pošalju jasan signal o regionalnoj saradnji. Ona je naglasila kako sve zemlje regije dijele iste interese i ciljeve te je energiju potrebno ulagati u učvršćivanje odnosa. Čomić je istakla kako je vrijeme da se prestanemo baviti prošlošću i onime što su radili naši preci te da na dobrobit naših unuka gledamo u budućnost.

Ranko Krivokapić, predsjednik Skupštine Crne Gore, naglasio je kako na dan objavljivanja izvještaja Evropske komisije o napretku zemalja u pristupnom procesu treba podsjetiti da je BiH „barometar cjelokupnog zdravlja odnosno stabilnosti regije“ čemu treba posvetiti dužnu pažnju.

Krivokapić je rekao da su sve to mlade države s dobrim i lošim periodima u svojoj historiji i dodao kako se nada jačanju međusobnog povjerenja i podršci zemalja regije, a Hrvatsku naveo kao dobar primjer pružanja podrške, koji Crna Gora u ovom trenutku pokušava da slijedi.

Predsjednica albanskog parlamenta Jozefina Topali izrazila je žaljenje zbog nedovoljne podrške Albaniji na njenom putu u Evropsku uniju, izrazivši uvjerenost kako je riječ o dvostrukim standardima. Ujedno je izrazila nadu da će hrvatskim ulaskom u punopravno članstvo Evropske unije sve zemlje regije, koje žele slijediti put evropskih integracija, u Hrvatskoj imati zastupnika zemalja jugoistočne Evrope.

Predsjedavajući Predstavničkog doma Parlamentarne skupštine BiH Denis Bećirović učestvovao i u diskusiji o temi "Saradnja u dimenzijama sigurnosti na zapadnom Balkanu" kojoj je bila posvećena druga sesija.

Tokom govora, Bećirović je naveo da se novim sigurnosnim prijetnjama moguće suprotstaviti samo zajedničkom akcijom, jer one ne mogu biti prevaziđene naporima pojedinačnih zemalja.

Jedini instrument za rješavanje gorućih sigurnosnih regionalnih pitanja na Balkanu jesu dogovor i iskrena saradnja za šta je neophodno otkloniti nepovjerenje među zemljama i narodima regiona kada je sigurnost u pitanju, poboljšati razmjenu informacija i ne bježati od zajedničkih inicijativa.

On je istakao podršku Evropske unije Bosni i Hercegovini i zemljama u regiji u unapređenju zajedničkih kapaciteta za borbu protiv kriminala, zahvaljujući čemu zemlje zapadnog Balkana sada polako ali sigurno izlaze iz situacije u kojoj su. On je kao pozitivne primjere u BiH naveo reformu odbrane te pristupanje NATO-vom programu Partnerstvo za mir a potom i MAP-u.

On je također istakao da je ispunjavanje obaveza Bosne i Hercegovine iz Mape puta za liberalizaciju viznog režima rezultiralo ispunjavanjem obaveza iz Sporazuma o stabilizaciji i pridruživanju daleko prije rokova predviđenih samim sporazumom.

Bećirović je rekao da je u regionu ojačana svijest o značaju i ulozi međusobnog povezivanja u svim oblastima, od slobodne trgovine, investicija, energetike, infrastrukture, do zajedničkih akcija u borbi protiv korupcije i svih vidova organiziranog kriminala ali da je osnovni preduslov za razvoj svih oblasti sigurno okruženje.

Svoje obraćanje Bećirović je završio isticanjem obaveze tranzicije regiona od sigurnosnog problema do sigurnosnog partnera, pritom izrazivši nadu da novi duh saradnje neće ostati samo na riječima već da će imati i svoju praktičnu primjenu.

Tokom boravka u Budimpšeti predsjedavajući Predstavničkog doma Denis Bećirović održao je bilateralne sastanke s predsjednikom Hrvatskog sabora Lukom Bebićem; potpredsjednicom Narodne skupštine Srbije Gordanom Čomić; predsjednikom Narodne skupštine Mađarske Laslom Koverom; predsjednicom Parlamenta Albanije Jozefinom Topali i predsjednikom Mađarske Paulom Šmitom.

Tokom susreta s predsjednikom Sabora Republike Hrvatske Lukom Bebićem istaknuto je da su otvorenost, iskrenost i povjerenje osnova odnosa Bosne i Hercegovine i Hrvatske, a parlamenti kao najviši zakonodavni organi treba otvoreno da razgovaraju o svim pitanjima. Predsjedavajući Bećirović čestitao je Hrvatskoj na okončanju pregovora za pristupanje Evropskoj uniji i istakao da je članstvo u EU značajno i za Bosnu i Hercegovinu i region u cjelini, te da iskustva Hrvatske na putu ka EU mogu itekako biti korisna Bosni i Hercegovini. Tokom susreta naglašeno je da je potrebno podsticati intenziviranje odnosa dvije zemlje čemu će doprinijeti i saradnja parlamenata ali isto tako da paralelno s jačanjem političkih odnosa treba unaprijediti i ekonomsku saradnju jer u tom segmentu postoji još dosta prostora za jače povezivanje.

Tokom sastanka predsjedavajućeg Predstavničkog doma Parlamentarne skupštine BiH Denisa Bećirovića s potpredsjednicom Narodne skupštine Srbije Gordanom Čomić naglašena je potreba za redovnijom i intenzivnijom komunikacijom na nivou rukovodstava parlamenata dvije zemlje ali i potreba iniciranja rješenja određenih otvorenih pitanja. Kako je rečeno tokom razgovora, prednost treba dati jačanju odnosa na državnom nivou. Pri tome je neophodno posebnu pažnju posvetiti što skorijoj realizaciji posjete delegacije Skupštine Srbije Bosni i Hercegovini. Prema riječima Bećirovića, bolja i redovnija komunikacija rukovodstava najviših zakonodavnih tijela je od ključne važnosti i za slanje pozitivnih poruka kao i za jačanje međusobnog povjerenja i razumijevanja. On je dodao i da će otvoreni dijalog doprinijeti jačem povezivanju dvije države.

Potpredsjednica Skupštine Srbije Gordana Čomić naglasila je da je dogovaranje ključ dobrih odnosa u regionu. Istakla je također da je jedan od modela međusobnog pomaganja na putu evropskih integracija intenziviranje bilateralnih, trilateralnih i multilateralnih susreta ali i usaglašavanje zajedničkih nastupa.

Prilikom susreta predsjedavajućeg Predstavničkog doma Parlamentarne skupštine BiH Denisa Bećirovića s predsjednikom Narodne skupštine Mađarske Laslom Koverom rečeno je da dosadašnja saradnja Bosne i Hercegovine i Mađarske može služiti kao primjer uspješnih međudržavnih odnosa na jugoistoku Evrope.

Tokom susreta u Budimpešti predsjedavajući Bećirović rekao je kako povećanje robne razmjene treba biti u fokusu odnosa dvije zemlje, što bi uticalo na bolju saradnju na ekonomskom planu. Ova oblast pruža još mnogobrojne mogućnosti i paralelno s političkim odnosima treba podsticati saradnju u oblasti privrede ali u svim drugim segmentima na obostrano zadovoljstvo, istakao je Bećirović. Prema njegovim riječima, bratimljenje

bosanskohercegovačkih gradova s mađarskim uticalo je na povezivanje građana dvije zemlje a očekuje se da ova uspješna saradnja na lokalnom nivou bude nastavljena i u budućnosti. Predsjednik Narodne skupštine Mađarske Laszlo Kover naglasio je kako će Mađarska nastaviti da pruža punu podršku Bosni i Hercegovini na njenom putu ka evroatlantskim integracijama kao i principijelnu politiku podrške suverenitetu i teritorijalnom integritetu države Bosne i Hercegovine.

U razgovoru predsjedavajućeg Predstavničkog doma Parlamentarne skupštine BiH Denisa Bećirovića s predsjednicom Parlamenta Albanije Jozefinom Topali izražen je interes obje zemlje za razvoj i unapređenje odnosa i saradnje na bilateralnom i multilateralnom nivou. Kao jedan od prvih koraka predloženi su češći i konstruktivniji susreti rukovodstava parlamenata dvije zemlje, te povezivanje parlamentarnih tijela i delegacija. Dogovoreni su redovni sastanci predstavnika parlamenata najmanje jednom godišnje što bi podstaklo jačanje saradnje na svim drugim nivoima.

S obzirom na zajedničke vanjskopolitičke ciljeve, sagovornici su se saglasili da je potrebno pronaći model za što bolje predstavljanje naših zemalja i stvaranje povoljnije slike o njima. Uz to, obje zemlje zainteresirane su za saradnju u oblasti priključivanja evroatlantskim integracijama kako bi se ubrzao put ka Evropskoj uniji.

Kada je riječ o ekonomskoj saradnji, predsjedavajući Bećirović istakao je da Bosna i Hercegovina s Albanijom ima pozitivan trgovinski bilans ali da postoji prostor za dalje jačanje ukupne trgovinske razmjene. S obzirom da postoje realne mogućnosti, jedan od važnijih interesa naše zemlje je povećanje izvoza iz BiH, istakao je Bećirović. Pri tome posebnu pažnju treba posvetiti intenziviranju saradnje u turizmu i zdravstvu te učiniti dodatne napore kako bi se ubrzalo zaključivanje većeg broja ugovora iz oblasti odbrane, kulture i sporta.

Tokom učešća na 5. konferenciji predsjednika parlamenata zemalja zapadnog Balkana, predsjedavajući Predstavničkog doma Parlamentarne skupštine BiH Denis Bećirović susreo se s predsjednikom Republike Mađarske Paulom Šmitom.

U otvorenom razgovoru predsjedavajući Bećirović zahvalio se na sveukupnoj pomoći Mađarske Bosni i Hercegovini na njenom evropskom putu, naglasivši kako saradnja dvije države i u narednom periodu treba biti uspješna i intenzivna. Fizičkom povezivanju građana BiH i Mađarske svakako će doprinijeti i Koridor Vc čime će se stvoriti još povoljnije pretpostavke za povezivanje poslovnih ljudi dvije države, rekao je Bećirović. Prijateljske odnose dvije zemlje potrebno je ojačati intenzivnijom ekonomskom saradnjom i sveukupnim jačanjem veza između Bosne i Hercegovine i Mađarske, zaključeno je tokom susreta predsjedavajućeg Bećirovića s predsjednikom Republike Mađarske.

Izvještaj pripremila

Jelena Rajaković
šef

Odjela za bilateralne odnose i protokol

***Izvještaj odobrio Denis Bećirović, predsjedavajući Predstavničkog doma PSBiH**

Prilog:

- Program konferencije i lista učesnika
- Govor Denisa Bećirovića „Izgledi integracija država zapadnog Balkana u EU“
- Govor Denisa Bećirovića „Saradnja u dimenzijama sigurnosti na zapadnom Balkanu“

Dostaviti:

- Kolegiju Predstavničkog doma
 - Kolegiju Doma naroda
 - Komisiji za vanjske poslove Predstavničkog doma
 - Komisiji za vanjsku i trgovinsku politiku Doma naroda
 - Sektoru za međunarodne odnose i protokol
- Kopija: Ministarstvo vanjskih poslova BiH